

განმარტებითი ბარათი
საქართველოს კანონის პროექტზე
„საქართველოს ადმინისტრაციულ სამართალდარღვევათა კოდექსში
ცვლილების შეტანის შესახებ“

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი:

ა.ა.ა) პრობლემა, რომლის გადაჭრასაც მიზნად ისახავს კანონპროექტი:

კანონპროექტის მიზანია საქართველოს გარემოს დაცვისა და სოფლის მეურნეობის სამინისტროს სახელმწიფო საქვეუწყებო დაწესებულება - გარემოსდაცვითი ზედამხედველობის დეპარტამენტის (შემდგომ - სსდ გარემოსდაცვითი ზედამხედველობის დეპარტამენტი) მუშაობის პრაქტიკაში წარმოქმნილი პრობლემების დარეგულირების მიზნით ადმინისტრაციულ სამართალდარღვევათა კოდექსის მოთხოვნების სრულყოფილი და ეფექტური აღსრულების უზრუნველსაყოფად, კოდექსის შესაბამისი მუხლების დისპოზიციების დაზუსტება, მუხლების ტექნიკური/ტერმინოლოგიური დახვეწა და მასში არსებული ხარვეზების აღმოფხვრა, რაც დეპარტამენტს დაეხმარება მისი ფუნქციების ეფექტიან განხორციელებაში.

ამასთან, ადმინისტრაციული პასუხისმგებლობა საჭიროებს არსებითად გადახედვას პასუხისმგებლობის გამკაცრების კუთხით, ვინაიდან ზოგიერთ შემთხვევაში კოდექსით განსაზღვრული პასუხისმგებლობა ვერ ქმნის შემაკავებელ ეფექტს კანონდამრღვევთათვის, რომ არაფერი ითქვას, ადმინისტრაციული სახდელის ზოგადი და კერძო პრევენციული დანიშნულების პრინციპის ხელყოფაზე.

გარდა ამისა, კანონპროექტი მიზნად ისახავს “M.A.P მოძრაობა ბრაკონიერობის წინააღმდეგ” საზოგადოების საკანონმდებლო წინადადების ნაწილის მიღებას, რომელიც ეხება ბრაკონიერული ფაქტების, მისი გამომწვევი მიზეზებისა და პრობლემის გადაჭრის გზების იდენტიფიცირებას და მათ აღმოფხვრას. კანონპროექტით გათვალისწინებულია ახალი - 181⁶ მუხლის დამატება და ამ უკანასკნელიდან გამომდინარე, შესაბამისი ცვლილებები 208-ე მუხლში, 222-ე მუხლის პირველი ნაწილსა და 239-ე მუხლის მე-4 და მე-13 ნაწილებში. აღნიშნული ცვლილება მომზადებულია საკანონმდებლო წინადადების საფუძველზე, რომლის თანახმადაც, მოთხოვნილია კუსტარული ელექტრომოკური აპარატების დამზადების/ფლობის/რეალიზაციის აკრძალვა.

თვითნაკეთი (კუსტარულად დამზადებული) ელექტრომოკის აპარატი გამოიყენება უკანონო თევზჭერისთვის (ბრაკონიერობისთვის) და წარმოადგენს საფრთხეს როგორც ადამიანთა სიცოცხლისა და ჯანმრთელობისთვის, აგრეთვე წყლის ბიომრავალფეროვნებისთვის, მათ შორის, ფიქსირდება აღნიშნული თვითნაკეთი მოწყობილობის გამოყენება სსდ გარემოსდაცვითი ზედამხედველობის დეპარტამენტის სწრაფი რეაგირების სამსახურის თანამშრომლების მიმართ, რასაც ახლავს სიცოცხლის მოსპობის მუქარაც. გარდა აღნიშნულისა, აგრეთვე ფიქსირდება თვითნაკეთი ელექტრომოკური მოწყობილობის გამოყენებით უშუალოდ ბრაკონიერების ჯანმრთელობის დაზიანებისა და სიცოცხლის მოსპობის ფაქტებიც.

ყოველივე ზემოაღნიშნული არღვევს საზოგადოებრივ წესრიგს და შეუქცევად ზიანს აყენებს გარემოს.

ა.ა.ბ) არსებული პრობლემის გადასაჭრელად კანონის მიღების აუცილებლობა:

„საქართველოს ადმინისტრაციულ სამართალდარღვევათა კოდექსში ცვლილების შეტანის შესახებ“ საქართველოს კანონში არსებული ხარვეზებისა და ნაკლოვანების გამოსწორება შესაძლებელია მხოლოდ ამავე კანონში შესაბამისი ცვლილების შეტანის გზით, რაც გამომდინარეობს ადეკვატური და ზომიერი სახდელის დაწესებით, რომელიც ხელს შეუწყობს კანონების დაცვას, საერთო ცხოვრების წესების პატივისცემას, აგრეთვე როგორც თვით სამართალდამრღვევის, ისე სხვა პირთა მიერ ახალი სამართალდარღვევების ჩადენის თავიდან აცილებას, რაც ასევე განპირობებულია კანონმდებლობის გამკაცრებით ან იმ არსებული ხარვეზების აღმოსაფხვრელად, რაც დეპარტამენტს დაეხმარება მისი ფუნქციების ეფექტიანად განხორციელებაში. ამასთან, გამომდინარე იქიდან, რომ თევზმიმზიდი ელექტრომოკური მოწყობილობა შეესაბამება „იარაღის შესახებ“ კანონით განსაზღვრულ სამოქალაქო იარაღს, მიზანშეწონილია, რომ ასეთი მოწყობილობა დაკვალიფიცირდეს თევზჭერის იარაღად და შესაბამისად დარეგულირდეს მისი სამოქალაქო ბრუნვაში დასაშვებობა.

აღსანიშნავია, „თევზჭერისა და თევზის მარაგის დაცვის ტექნიკური რეგლამენტის დამტკიცების თაობაზე“ საქართველოს მთავრობის 2013 წლის 31 დეკემბრის N423 დადგენილების მე-6 მუხლის „ბ“ პუნქტი, რომლის შესაბამისად, აკრძალულია თევზჭერა ელექტროდენით, ელექტრომოკის აპარატით და თვითნაკეთი ელექტრონული ხელსაწყოებით. ამასთან, აღნიშნული პუნქტით დადგენილი აკრძალვა ელექტროდენით თევზჭერაზე არ ვრცელდება სამეცნიერო-კვლევითი მიზნით თევზჭერაზე იმ შემთხვევაში, თუ კანონმდებლობით დადგენილი წესით წარდგენილ განცხადებაში დასაბუთებულია კონკრეტული სახის ელექტრომოწყობილობით (თევზმიმზიდი მოწყობილობა, რომელიც ზიანს არ აყენებს თევზს) თევზჭერის ჩატარების მიზანშეწონილობა, ასევე დასაბუთებულია გამოსაყენებელი კონკრეტული სახის ელექტრომოწყობილობის გამოყენების უსაფრთხოება და წარმოდგენილია მისი აღწერა. შესაბამისად, სამოქალაქო ბრუნვაში დაიშვება მხოლოდ ისეთი თევზმიმზიდი ელექტრომოკური მოწყობილობა, რომელიც დამზადებულია ქარხნული წესით, გამოიყენება მხოლოდ სამეცნიერო-კვლევითი მიზნით საქართველოს გარემოს დაცვისა და სოფლის მეურნეობის სამინისტროს მიერ გაცემული წერილობითი თანხმობის საფუძველზე და აკმაყოფილებს ზემოაღნიშნული დადგენილებით განსაზღვრულ ტექნიკურ პარამეტრებს.

ა.ბ) კანონპროექტის მოსალოდნელი შედეგები:

კანონპროექტის მიღების შედეგად მოხდება კოდექსში არსებული ხარვეზებისა და ნაკლოვანებების გამოსწორება, პრევენციის/შემცირების მიმართულებით კოდექსის სრულყოფა, რაც მდგომარეობს კანონმდებლობის გამკაცრებაში. აგრეთვე, კანონპროექტის მიღების შედეგად, დარეგულირდება თევზჭერისთვის გამოყენებული იარაღების სამოქალაქო ბრუნვა და განისაზღვრება შესაბამისი სახდელები აღნიშნული წესების დარღვევისთვის.

ცვლილებები, კონტროლის გამკაცრებისა და სამართალდარღვევის პრევენციის შესაძლებლობას მისცემს, როგორც სსდ გარემოსდაცვითი ზედამხედველობის დეპარტამენტის, ასევე საპატრულო პოლიციის თანამშრომლებს. იმ შემთხვევაში, თუ თევზმიმზიდი ელექტრომოკური მოწყობილობა ვერ აკმაყოფილებს საქართველოს მთავრობის დადგენილებით განსაზღვრულ ტექნიკურ მახასიათებლებს, ან/და პირი,

რომელსაც გადააქვს ასეთი მოწყობილობა ვერ წარმოადგენს საქართველოს გარემოს დაცვისა და სოფლის მეურნეობის სამინისტროს წერილობით თანხმობას სამეცნიერო-კვლევითი მიზნით თევზჭერის განხორციელების შესახებ, გამოიწვევს ადმინისტრაციულ სამართალდარღვევათა კოდექსით გათვალისწინებულ პასუხისმგებლობას.

ა.გ) კანონპროექტის ძირითადი არსი:

- 51² მუხლი ყალიბდება ახალი რედაქციით გამომდინარე იქიდან, რომ მიწის ნაყოფიერი ფენის მოხსნაც და გადაადგილებაც (რაც დაკავშირებული არ არის დადგენილი წესით ნებადართულ ღონისძიებებთან) ცალ ცალკე დამოუკიდებლად წარმოადგენს სამართალდარღვევას და ამავე დროს შესაძლებელია მიწის ნაყოფიერი ფენის მოხსნა განახორციელოს ერთმა პირმა, ხოლო გადაადგილება მეორემ - აუცილებელი აღნიშნული ორივე ქმედება ექვემდებარებოდეს პასუხისმგებლობას როგორც ერთად ასევე ცალ-ცალკე. გამომდინარე აღნიშნულიდან ხსენებული მუხლის დისპოზიცია ყალიბდება შემდეგნაირად: მიწის ნაყოფიერი ფენის მოხსნა ან/და გადაადგილება, რაც დაკავშირებული არ არის დადგენილი წესით ნებადართულ ღონისძიებებთან;
- 58² მუხლის მე-7 ნაწილი ყალიბდება ახალი რედაქციით გამომდინარე იქიდან, რომ სახელმწიფო კონტროლის განხორციელების ფარგლებში, გარემოსდაცვითი ზედამხედველობის დეპარტამენტის შავი ზღვის დაცვის კონვენციური სამმართველოს მიერ გამოვლენილი შავი ზღვის დაბინძურების ფაქტების უმეტესობა ჩადენილია საერთაშორისო ნაოსნობაში ჩართული უცხო ქვეყნის დროშის ქვეშ მცურავი გემების მიერ. ამავდროულად, შავი ზღვის ქვეყნების საერთაშორისო პრაქტიკის ანალიზით დგინდება, რომ თურქეთში, ნავთობპროდუქტებით შავი ზღვის დაბინძურებაზე საზღვაო ხომალდების საერთო წონის შესაბამისად, საჯარიმო სანქციების ოდენობა მკვეთრად აღემატება საქართველოში განსაზღვრულ საჯარიმო თანხის ოდენობას. კერძოდ:
 - 1000 ტონის ჩათვლით საერთო წონის საზღვაო ხომალდიდან შავი ზღვის დაბინძურებაზე საჯარიმო თანხა 265 700 ლარამდეა განსაზღვრული;
 - 1001 -დან 5000 ტონამდე და ჩათვლით, საერთო წონის საზღვაო ხომალდიდან შავი ზღვის დაბინძურებაზე საჯარიმო თანხა 265 766 ლარიდან - 531 486 ლარამდეა განსაზღვრული;
 - 5001 ტონა და მეტი საერთო წონის საზღვაო ხომალდიდან შავი ზღვის დაბინძურებაზე საჯარიმო თანხა დაახლოებით 797 186 ლარითაა განსაზღვრული.ასევე მაღალია საჯარიმო სანქციები რუმინეთში და ბულგარეთში. ყოველივე ზემოთ აღნიშნულიდან გამომდინარე, შავი ზღვის ქვეყნებთან ზღვის დაბინძურების კუთხით საჯარიმო სანქციების ჰარმონიზების მიზნით, აუცილებელია ადმინისტრაციულ სამართალდარღვევათა კოდექსის 58² მუხლის მე-7 ნაწილით გათვალისწინებული ჯარიმის ოდენობა 65 000 ლარიდან გაიზარდოს 100 000 ლარამდე.
- კოდექსს ემატება 181⁶ მუხლი, რომელიც შედგება 4 ნაწილისგან და არეგულირებს თევზჭერის იარაღის სამოქალაქო ბრუნვას;
- 181⁶ მუხლის პირველი ნაწილი არეგულირებს სამოქალაქო ბრუნვაში დაშვებული თევზმიმზიდი ელექტრომოკური მოწყობილობის მართლსაწინააღმდეგო შექმნის, შენახვის, ტარების, გადაცემისა და გასხვისების შემთხვევებს და აღნიშნული მოთხოვნების დარღვევისთვის ჯარიმა განსაზღვრულია 1000 ლარის ოდენობით და იარაღის კონფისკაციით, ხოლო მე-2 ნაწილი კი განსაზღვრავს აღნიშნული

ქმედების განმეორებით ჩადენას, რაც გამოიწვევს ჯარიმას 2000 ლარის ოდენობით და იარაღის კონფისკაციით;

- 181⁶ მუხლის მე-3 ნაწილი არეგულირებს თევზჭერის ელექტრო იარაღის დამზადების, შექმნის, შენახვის, ტარების, გადატანა-გადაზიდვის, გადაგზავნისა და გასაღების საკითხს და აწესებს ჯარიმას 3 000 ლარის ოდენობით და იარაღის კონფისკაციით, ხოლო მე-4 ნაწილი კი განმეორებით ჩადენას რაც გამოიწვევს დაჯარიმებას 6 000 ლარის ოდენობით, სამართალდარღვევის იარაღის კონფისკაციით;
- 222-ე მუხლის მე-2 ნაწილი ყალიბდება ახალი რედაქციით და მას ემატება ის აუცილებელი სამართალდარღვევის მუხლები რომლებიც არ საჭიროებს ადმინისტრაციულ გამოკვლევას, ან თუ სამართალდამრღვევი სადავოდ არ ხდის თავის მიერ ჩადენილი ადმინისტრაციული სამართალდარღვევის ფაქტს და ამას ხელმოწერით ადასტურებს. ამ შემთხვევაში, სსდ გარემოსდაცვითი ზედამხედველობის დეპარტამენტის შესაბამისი თანამშრომელი უფლებამოსილია ადგილზე განიხილოს ადმინისტრაციული სამართალდარღვევის საქმე და სამართალდამრღვევს ადგილზევე დაადოს აღნიშნული ადმინისტრაციული სამართალდარღვევის ჩადენისთვის გათვალისწინებული როგორც ძირითადი, ისე დამატებითი ადმინისტრაციული სახდელი.

ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):

ასეთი არ არსებობს.

ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში, აღნიშნულის თაობაზე შესაბამისი დასაბუთება:

კანონი ამოქმედდება 2024 წლის 2 ივნისიდან, ვინაიდან, კოდექსის 222-ე მუხლის პირველ ნაწილში და 239-ე მუხლის მე-4 ნაწილში შეტანილია ცვლილებები (ცვლილების შესაბამისი კანონით), რომელიც ძალაში შედის 2024 წლის 1 ივნისს. შესაბამისად, რომ არ მოხდეს მუხლების გადაფარვა და გამოირიცხოს შესაძლო საკანონმდებლო ხარვეზები, მიზანშეწონილია, წარმოდგენილი კანონპროექტის 2024 წლის 2 ივნისიდან ამოქმედება. კანონპროექტი არ ითვალისწინებს კანონისთვის უკუძალის მინიჭებას.

ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):

კანონპროექტის დაჩქარებული წესით განხილვა არ არის მოთხოვნილი.

ბ) კანონპროექტის ფინანსური გავლენის შეფასება საშუალოვადიან პერიოდში (კანონპროექტის ამოქმედების წელი და შემდგომი 3 წელი):

ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო;
კანონპროექტის მიღება არ გამოიწვევს სახელმწიფო ბიუჯეტიდან შესაბამისი თანხების გამოყოფას.

ბ.ბ) კანონპროექტის გავლენა სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის საშემოსავლო ნაწილზე;

კანონპროექტის მიღების შემთხვევაში გაიზრდება სახელმწიფო, ბიუჯეტის შემოსულობები, რადგანაც კანონპროექტით გათვალისწინებული ადმინისტრაციული სამართალდარღვევისთვის გადახდევინებული ჯარიმები ექვემდებარება სახელმწიფო ბიუჯეტში ჩარიცხვას, თუმცა წინასწარ განსაზღვრა თუ რამდენი პირი ჩაიდენს ადმინისტრაციულ სამართალდარღვევას და შესაბამისად რა თანხები შევა ბიუჯეტში ამ ეტაპზე შეუძლებელია.

ბ.გ) კანონპროექტის გავლენა სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის ხარჯვით ნაწილზე;

კანონპროექტის მიღება გავლენას არ მოახდენს სახელმწიფო, ბიუჯეტის ხარჯვით ნაწილზე.

ბ.დ) სახელმწიფოს ახალი ფინანსური ვალდებულებები, კანონპროექტის გავლენით სახელმწიფოს ან მის სისტემაში არსებული უწყების მიერ მისაღები პირდაპირი ფინანსური ვალდებულებების (საშინაო ან საგარეო ვალდებულებები) მითითებით;

კანონპროექტი არ ითვალისწინებს სახელმწიფოს ახალ ფინანსურ ვალდებულებებს, აგრეთვე სახელმწიფოს ან/და მის სისტემაში არსებული უწყების მიერ მისაღებ პირდაპირ ფინანსურ ვალდებულებებს.

ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება, იმ ფიზიკურ და იურიდიულ პირებზე გავლენის ბუნებისა და მიმართულების მითითებით, რომლებზედაც მოსალოდნელია კანონპროექტით განსაზღვრულ ქმედებებს ჰქონდეს პირდაპირი გავლენა;

პირებს პომლებიც ჩაიდენენ კანონპროექტით გათვალისწინებულ დარღვევას დაეკისრებათ ამავე კანონპროექტით გათვალისწინებული ადმინისტრაციული პასუხისმგებლობა (ჯარიმა).

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის (ფულადი შენატანის) ოდენობა შესაბამის ბიუჯეტში და ოდენობის განსაზღვრის პრინციპი;

58² მუხლის მე-7 ნაწილი ყალიბდება ახალი რედაქციით და საჯარიმო სანქცია განისაზღვრება 100 000 ლარით გამომდინარე იქიდან, რომ სახელმწიფო კონტროლის განხორციელების ფარგლებში, გარემოსდაცვითი ზედამხედველობის დეპარტამენტის შავი ზღვის დაცვის კონვენციური სამმართველოს მიერ გამოვლენილი შავი ზღვის დაბინძურების ფაქტების უმეტესობა ჩადენილია საერთაშორისო ნაოსნობაში ჩართული უცხო ქვეყნის დროშის ქვეშ მცურავი გემების მიერ. ამავდროულად, შავი ზღვის ქვეყნების საერთაშორისო პრაქტიკის ანალიზით დგინდება, რომ თურქეთში, ნავთობპროდუქტებით შავი ზღვის დაბინძურებაზე საზღვაო ხომალდების საერთო წონის შესაბამისად, საჯარიმო სანქციების ოდენობა მკვეთრად აღემატება საქართველოში განსაზღვრულ საჯარიმო თანხის ოდენობას. კერძოდ:

- 1000 ტონის ჩათვლით საერთო წონის საზღვაო ხომალდიდან შავი ზღვის დაბინძურებაზე საჯარიმო თანხა 265 700 ლარამდეა განსაზღვრული;
- 1001 -დან 5000 ტონამდე და ჩათვლით, საერთო წონის საზღვაო ხომალდიდან შავი ზღვის დაბინძურებაზე საჯარიმო თანხა 265 766 ლარიდან - 531 486 ლარამდეა განსაზღვრული;

- 5001 ტონა და მეტი საერთო წონის საზღვაო ხომალდიდან შავი ზღვის დაბინძურებაზე საჯარიმო თანხა დაახლოებით 797 186 ლარითაა განსაზღვრული.

ასევე მაღალია საჯარიმო სანქციები რუმინეთში და ბულგარეთში. ყოველივე ზემოთ აღნიშნულიდან გამომდინარე, შავი ზღვის ქვეყნებთან ზღვის დაბინძურების კუთხით საჯარიმო სანქციების ჰარმონიზების მიზნით, აუცილებელია ადმინისტრაციულ სამართალდარღვევათა კოდექსის 58² მუხლის მე-7 ნაწილით გათვალისწინებული ჯარიმის ოდენობა 65 000 ლარიდან გაიზარდოს 100 000 ლარამდე გაზრდა.

გარემოსდაცვითი ზედამხედველობის დეპარტამენტის მიერ გამოვლენილი ზღვის დაბინძურების ფაქტები, ასკ 58² მუხლის VII ნაწილი

წელი	სამართალდარღვევის ფაქტების რაოდენობა	დაკისრებული ჯარიმის ოდენობა (ლარი)
2021 წელი	5	325,000.0
2022 წელი	21	1,300,000.0
2023 წელი, იანვარი-სექტემბერი	14	910,000.0
სულ	40	2,535,000.0

ბ¹) ბავშვის უფლებრივ მდგომარეობაზე კანონპროექტის ზეგავლენის შეფასება:

კანონპროექტი ზეგავლენას არ მოახდენს ბავშვის უფლებრივ მდგომარეობაზე.

ბ²) გენდერული თანასწორობის მდგომარეობაზე კანონპროექტის მოსალოდნელი ზეგავლენის შეფასება:

კანონპროექტის მიღებით გენდერული თანასწორობის მდგომარეობაზე ზეგავლენის მოხდენა მოსალოდნელი არ არის.

გ) კანონპროექტის მიმართება საერთაშორისო სამართლებრივ სტანდარტებთან:

გ.ა) კანონპროექტის მიმართება ევროკავშირის სამართალთან:

კანონპროექტი არ ეწინააღმდეგება ევროკავშირის სამართალს.

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

კანონპროექტი არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს.

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, - მისი შესაბამისი მუხლი ან/და ნაწილი;

კანონპროექტი არ ეწინააღმდეგება საქართველოს ორმხრივ და მრავალმხრივ ხელშეკრულებებს. აგრეთვე, კანონპროექტის მიღება არ უკავშირდება რომელიმე ხელშეკრულებას/შეთანხმებას.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირსა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთან დადებული საქართველოს სხვა ორმხრივი და მრავალმხრივი ხელშეკრულებებიდან; ასეთი არ არსებობს.

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომელმაც მონაწილეობა მიიღო კანონპროექტის შემუშავებაში, ასეთის არსებობის შემთხვევაში: ასეთი არ არსებობს.

დ.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში: ასეთი არ არსებობს.

დ.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში: ასეთი მიმოხილვა არ მომზადებულა.

ე) კანონპროექტის ავტორი:

საქართველოს გარემოს დაცვისა და სოფლის მეურნეობის სამინისტრო.

ვ) კანონპროექტის ინიციატორი:

საქართველოს მთავრობა.